

摘藻堂四庫全書薈要

集部

欽定四庫全書薈要

集部

明文衡卷七十五至七



詳校官候選知縣吳面華

欽定四庫全書薈要卷二萬二百二十八

集部

明文衡卷七十五

明 程敏政 編

神道碑

湘獻王神道碑文

解縉

自古帝王受命拯溺亨屯必有追崇盛典褒嘉旌異顯  
微闡幽昭示來世若成湯之弔龍逢武王式商容之間  
封比干之墓銅盤勒銘燭于千古政有因革異世同符

矧惟我太祖高皇帝功光宇宙道盡君師恩義兼隆子  
姓多吉弘祐于我今上皇帝天道顯助震動侯志會朝  
清明揖讓底定日月光華黎庶鼓舞申明舊章民物安  
堵曾不逾時化危而安易亂而治山川草木皆有喜氣  
達孝推恩施由親始惟我太祖高皇帝第十二子湘王  
純孝秉哲遇害于苦塊之間窮苦沈抑皇帝嗟悼無已  
詢咨羣言褒諡曰獻治其祠墳詔翰林院學士臣縉曰  
湘獻王懿德文武嬰茲荼毒朕將昭顯之爾其為文樹

石神道永示無極臣縉仰惟皇上因心篤慶比于成湯  
周武弔龍逢封比干之事戚疏等差忠厚有加不敢以  
菲薄辭拜手稽首叙次為文謹按謚法聰明睿智嚮惠  
內德曰獻惟王幼而美異長而通明溫恭粹德武而右  
文讀書窮理自為課程常至夜分不寐篝燈屏枕皆自  
勒銘以為警策齋明盛服精思力踐有所獨得于死生  
之故天道之微包括宇宙貫一古今人莫能窺其際也  
嘗欲著述以開來學手未嘗釋卷開景玄閣延四方賢

士編輯閎富皆有緒而具在可踵而成有益于斯文學者甚厚其平居被服儒素姿體明秀望之玉山晴霞即之春風麗日聽其言淡而不厭和鑾佩玉從容合度自然足以廉頑起懦不自覺其入人之深也然膂力過人握弓矢刀槊上馬奮捷如飛論古兵制前事成敗出人意表逆兵反常德進至荆之虎渡王曰彼兵銳甚必有意挫之今漸沮劒若縱使得入塞遺禍將大卽自畫計遣將奮前擊之敗其前鋒遂窮追之逆兵由是竟不得

出塞途中數敗至延安殲焉實本王之首挫其銳算無遺策卒成大功太祖益嘉之特召至京慰勞遣還五開蠻作亂太祖命王率諸軍討之先入據其窟穴遣人四出招諭盡降其衆不戮一人太祖大悅勞遣還國其卓卓大者類如此又嘗造棺槨和藥餌施與軍民之貧者出入以縹囊盛書自隨祁寒暑雨不廢講誦聘問賢士備極恩禮過佳山水古跡徘徊終日必為歌詩文章刻著石上書法深繹晉人精思動合矩度太祖每有制作

喜令書之詩歌豐腴清麗飄飄有出塵之想其文亦燦然理順造次輒成至于近世科舉之作反覆道義貫通經傳先生文士佔畢一世所不能盡者其天資高邁不可及有如此也自太祖賓天哭踊幾絕因忽忽內傷有棄人間意逮建文君信讒者誣之以罪遣人圍其宮城逼執之王仰天嘆曰嗟乎吾觀前世大臣遇昏暴之朝將詔獄下吏便自引決身親太祖皇帝子南面而王太祖賓天疾不及視葬不及會抱茲沈痛有何樂于世今



又將辱于奴婢之人乎苟求生活吾不能也因復痛哭  
灑地沾濕繼之以血具衣冠赴火死闔宮皆從之時洪  
武三十二年四月十三日王諱柏母妃胡氏洪武四年  
八月初三日生十一年正月一日受冊封為湘王建國  
于荊州十八年十二月之國妃吳氏靖海侯禎之女生二  
女皆夭無子墓在荊之江陵縣西太暉山之原銘曰

猗嗟獻王孝乎高皇高皇篤愛王此大邦襟喉楚蜀粵  
惟荆湘旣文旣武有輯有攘蠡彼蠻寇蝟而跳梁帝命

往往征深入其疆招之畢來人其豺狼帝曰良哉于家有  
光窮寇豕突變起倉卒驚埃懸空聞者怵惕惟王神武  
謂彼奇獍長驅無前奔北以出將遺大難天下罔恤惟  
王至仁得人死力受算窮追寇以就殛聖道日還孔繁  
載籍惟王經緯有刪有述才兼衆長識邁千古開我後  
人功非小補遭讒舍已從容就義不辱其身不降其志  
坏土荒烟蕪翳不治縉紳過之尚或流涕巍巍聖皇功  
高湯武理其祠墳紆哀泉土龍章金冊繡裳袞衣惟王

英爽象服是宜揭昭天地精神在天帝德王靈垂光萬年

追封奉天靖難推誠宣力武臣特進榮祿大夫  
右柱國榮國公加封河南王謚忠武張公神道  
碑銘 楊士奇

王諱玉字世美姓張氏世家河南開封之祥符曾祖某  
祖某父天祐皆追封榮國公曾祖妣某祖妣劉妣王皆  
追封榮國夫人王初仕元為樞密知院已而灼知天命

洪武乙丑自拔來歸我太祖高皇帝禮遇甚厚王感奮思效戊辰從征博裕勒海子哈勒哈之地以功授濟南衛副千戶又從勦盆鴻特穆爾至延安延川還陞明威將軍安慶衛指揮僉事庚午從征永順散毛諸洞辛未逐元人之侵邊者至鴉寒山而還調燕山左護衛癸酉追寇至黑松林甲戌征野人等處陞都指揮同知戊寅朝廷用讒加兵親藩事急太宗皇帝不得已舉靖難之師帷幄謀畫悉以任王王推誠致慮夙夜不懈事可否進

止衆論紛紜未定者王正色數語決之咸中機宜故凡

舉措必咨于王首用王策奪北平九門撫順討逆三日  
城內外悉定師將南出王曰不先定薊州將為後患薊  
平餘不足平時薊州守馬宣謀起兵迎拒上命王討之  
王至諭之不下環城攻之宣率衆出戰遂執宣殺之并  
執指揮毛某王知其可用釋不殺送詣北平遂撫輯軍  
民是夜急趨遵化豫戒將士止殺曰師行以得人心為  
本遂簡敢勇士四鼓登陴開其城門將士皆入城中始

覺守將率衆拒戰執其將斬之餘不傷一人將吏悉隨  
王上謁遂移師永平密雲皆望風輸款從至灤河王進  
曰都督潘忠楊松在莫州扼吾南路宜先禽之上悅遂  
親發兵命王為先鋒用其計取涿州雄縣生擒潘楊時  
長興侯耿炳文率兵二十萬屯真定王自請往覘之還  
言軍無紀律且其上有敗氣無能為上至無極以敵衆  
我寡欲試諸將勇怯召問今舉兵所嚮自度可必勝否  
衆未有所適王曰今當徑趨真定彼雖衆然新集未齊

我軍乘勝一鼓可破之上曰王言合吾意吾倚王一人足辦明日抵真定接戰炳文大敗幾被禽獲其左副將軍駙馬都尉李堅右副將軍都督甯忠及都督顧成等斬首三萬餘級獲馬二萬復敗安陸侯吳傑軍上召王諭曰汝之功也非汝與吾意合不及此永平馳報江陰侯吳高等以遼東兵攻圍城急又諜報曹國公李景隆引兵數十萬將攻北平城上與王謀先援永平既至高等望風棄輜重遁王從上追之斬獲甚衆王言大寧去

此不遠請移軍襲之可免後顧從之遂從攻大寧自辰至午城破斬其都指揮朱鑑執都指揮房寬下令安撫城中頃刻而定北平報李景隆兵圍城遂旋師王請先攻其營然後歸援從之徑搗景隆營大戰三日城中亦鼓譟出表裏夾攻景隆軍不支大敗遁去從攻廣昌蔚州進攻大同悉下謀報景隆收潰散卒號百萬且復至王言兵貴神速先事者勝請往駐白溝河以逸待勞可必勝也上命王率衆馳往駐三日景隆兵至王以



精騎馳擊之斬馘無算景隆復大敗收餘卒退保濟南  
乘勝追擊圍其城旣而解圍還攻滄州獲其大將徐凱  
進攻東昌敵列陣決戰上以數千騎繞出陣後敵圍數  
匝上已衝擊而出王不知上所在突入敵陣大戰連殺  
百數十人王亦被創而歿十二月廿五日云春秋五十  
有八上哭之慟旣旋師諸將皆侍語及東昌事上曰勝  
負兵家常事不足計所恨艱難之際失張玉良輔吾至  
今寢不帖席食不下咽隕涕不已諸將皆泣上旣正大

統行報功之典顧侍臣曰張王才備智勇論靖難功當  
第一惜其蚤沒贈奉天靖難推誠宣力武臣特進榮祿  
大夫右柱國追封榮國公謚忠顯追封其三代考妣仁  
宗皇帝在春宮數與侍臣言張王識見謀畧卓然老成  
非諸將所及且端方有匡直之益誠難得也旣嗣位加  
封河南王改謚忠武告于廟以配享太宗親制祭王之  
文有秉義懷忠一心為國靖難之際發謀奮勇百戰當  
前所嚮風靡大功垂成挺身陷陣惟義所在視死如歸

忠精貫于星日功烈揚于竹帛之褒蓋王為人莊重果  
毅涉獵書史明其大義而識慮高遠治家禮法秩然奉  
命行師紀律嚴肅與士卒同甘苦未嘗妄戮一人每語  
麾下曰為將當濺血戰袍流芳汗簡蓋其殉國之志素  
定古名將何過焉配王氏樞密院判執中之女有令德  
累封王夫人子男三長輔起武功累進奉天靖難推誠  
宣力輔運佐理武臣特進光祿大夫左柱國英國公太  
師監修國史知經筵事功德茂碩為國元臣次輓神策

衛指揮使次軌錦衣衛指揮同知女一永樂中冊為貴妃孫男六長忠授勲衛次鑑次瑾次瑄次斌次某孫女八長洪熙中冊為敬妃次適清平伯吳英餘在室余陪太師公在史館經筵久以余永樂洪熙從臣實聞二聖所嘗論王者屬銘神道之碑敬叙而銘之銘曰

文皇奉天中興邦國桓桓忠武奮起羽翼帷幄密勿長策深畫上契淵衷魚水之得義旗肇舉仗劍先驅斂城九門功其權輿取薊遵化如探穴雖孰其抗鋒摧朽折

枯龍馭旣南大旆在前連下雄鄭遄奮常山長河無險  
鐵城不堅撫降殲逆德威並宣決志敵愾遑恤厥躬精  
誠貫日勁氣吐虹聊城之鏖髮怒上衝先軫戰旗千載  
一忠王勞在國王績在史王嗣象賢益閔以偉帶礪山  
河廷有明誓清廟陟配逾千萬祀

奉天靖難推誠宣力武臣特進榮祿大夫右柱  
國太子太傅成國公追封東平王諡武烈朱公

神道碑銘

楊士奇

天命仁聖為下民主必生文武材畧恢傑弘偉之士為之輔翼相與協力一心靖暴亂致治平以建非常之功夫肇創之績難矣中興尤非易也故前史贊勲臣率以肇創中興並言若我太宗文皇帝龍興北藩安宗社于將危保洪業于永固其功蓋又有難者以一隅之衆而應四方強盛之敵靡堅不摧靡剛不馴固自天之所定亦必有材畧恢傑弘偉之佐以效夫疏附先後奔走禦侮之能是以大功之成勃然莫之能禦也若時東平武

烈王其偉然傑然特出者乎王姓朱氏諱能字士弘世家鳳陽之懷遠曾祖考某妣某氏父亮從太祖皇帝征伐有功累陞武毅將軍燕山中護衛副千戶謹持行善撫士有譽于時母某氏王生有令質自少喜讀書事父母至孝洪武甲戌襲父職事太宗皇帝于藩邸小心愼恭未嘗少懈而撫恤下人一如其父甚為上所信任旦夕侍不去側奉天靖難之師初與帷幄密議惟河間忠武王與王預焉時北平三司之交構造禍者王與忠武

建議率麾下首擒之遂奪城九門撫綏城內外三日人以大定引兵攻薊州擒其將都指揮馬宣等遂取遵化永平密雲從上攻灤河旣還從克雄縣首破其東門敵衆敗走追及于月漾橋執其總帥都督楊松潘忠等復追其餘衆于鄭州斬獲不可勝計乘勝長驅入真定大敗長興侯耿炳文兵時王獨與敢死士三十餘騎追奔至滹沱河炳文衆尚數萬復列陣嚮王王奮勇大呼衝入敵陣敵衆披靡自相蹂躪死者無算棄甲來降者三



千餘人上大悅賜書褒諭永平馳報江陰侯吳高以遼東兵攻城急王從上赴援高遁走王追及之多所殺獲遂從定大寧戮其拒命撫輯其衆而還時曹國公李景隆率兵攻北平城王從上至鄭村塢與景隆兵遇大戰敗之進攻其營又敗之景隆兵列營九門者連敗之城亦出兵夾擊景隆狼狽走王從攻廣昌蔚州大同次第悉下景隆復收潰散之卒號百萬來攻上親拒之王為前鋒午至白溝河敗其都指揮平安軍及申又與敵

兵戰大敗之明日王領左哨當前鋒又大敗敵兵盡克其砦柵敵走保濟南王率衆追之至鐸山敵嚴兵列陣以待王連破之敵衆釋兵降者萬餘人王以聞上悉撫而縱之蓋自是敵兵戴德皆願來歸無復鬪志然上得之卽遣之不留王從攻滄州先破其東門入城斬首六萬餘級敵震懼遂獲其總帥徐凱進攻東昌敵列陣決戰上以數千騎出陣後敵圍上數匝王奮力翼上以出進戰夾河王為奇兵先鋒大敗敵將盛庸兵又敗平安

兵于藁城追奔至真定戰其東門斬首萬餘級遂畧彰  
德及定州勦西水寨已而敗敵將李文于德州遂克東  
阿東平破汶上諸寨設伏泚河敗平安兵十餘萬進戰  
小河為敵所乘稍却諸將遽請旋師獨王力勸上行曰  
用兵未必常勝豈可因小挫輒自沮項羽百戰百勝竟  
亡漢高屢敗而終興自殿下舉兵來克捷多矣此小挫  
何足置意但當以宗社為重整兵前進耳上撫掌嘆曰  
爾言深合吾心遂行至靈壁敵盛兵迎戰王先登陷陣

大敗之生擒其副總兵陳暉平安叅將馬溥徐真及都指揮三十餘人獲馬二萬敵衆死者屍蔽原野降者數十萬人悉縱遣之進克泗州渡淮敗盛庸兵遂克盱眙下揚州從上渡江入京師內難平諸王臣民推戴上承大統論靖難功王居首賜號奉天靖難推誠宣力武臣特進榮祿大夫右柱國左軍都督府左都督封成國公食祿三千五百石子孫世襲賜誥券追封三代考皆成國公妣皆成國夫人永樂二年命兼太子太傅四年安

南黎季犛弑其國王毒虐下人拒遏詔使數諭弗悛遂發兵討罪命王總兵佩征夷大將軍印率左右副將軍左右叅將及神機橫海驃騎遊擊鷹揚五將軍兵八十八萬討之瀕行上親送之龍江師至廣西上顧侍臣曰朕夜察天象西帥有憂其朱能乎然能足辦斯事朕第慮氣候非其所習耳踰旬計聞上震悼輟視朝五日一時同王從舉義者永康侯徐忠等十數人皆入奉慰上灑泣曰方艱難時協力一心相濟能其首也且其素存心

行事皆應遠到曷遽止此言已益酸楚左右皆流涕莫敢仰視蓋王至龍州嬰疾薨十月初二日也春秋三十有七上親為文祭之宸衷悲愴溢于言表讀者皆為泣下賻卹特厚追封東平郡王賜諡武烈并加贈其三代皆王爵仁宗皇帝臨御特詔王配享太宗廟廷賜祭之文尤極褒重蓋當時元功之首也王頎然魁碩勇力過人器宇宏博智識高遠雍容端重辭氣溫裕廣坐羣議王折衷之詞簡理當無不心服善馭將士教訓撫恤親

若父子紀律明肅無敢踰越每遇勁敵大呼馳鬪以一  
當百敵皆望風辟易懷綏降附恩惠周至出謀制勝靡  
有遺策尤善用才人率歸心雖古良將不過是也葬昌  
平北澤山之原配王氏累封東平郡王夫人子男若干  
長勇襲封成國公太子太保篤實公忠祇勤弗懈歷事  
四朝國所倚重次某某官女若干某官某其壻也孫男  
若干孫女若干永樂初某侍講禁林凡軍國事預陪廷  
議恒與王接知之有素至是太保公屬書神道之碑敬

叙而為銘銘曰

明聖之興天實命之必有名世輔翼攸資文皇大聖奉  
藩恭恪天將啟之內難奄作有不得已義旗載揚彬彬  
文武風雲奮興于時東平雄才弘畧夜寐夙興密侍帷  
幄刈違撫順式宣德音環城中外有截一心金戈所嚮  
漁陽風靡永平不固大寧傾圯後顧無虞前驅翩翩折  
朽雄鄭摧堅中山益都追奔滄州殲逆咸奮先登電掃  
霆掣青齊旣帖踴躍而南持志決往宗社為心靈壁疾



下長淮飛渡茫茫圻甸有迓無拒大江無險內難廓清  
翼龍升御天開日明國有元良遂兼儲傅端肅之行寬  
仁之度南交弗靖奉命徂征師未出疆大星墮營天不  
憖遺堂柱遽仆帝聞盡傷卹典隆厚忠存社稷勲載簡  
編偉哉嗣興顯顯象賢河山有誓追崇有詔皇明萬年  
永配清廟

明文衡卷七十五

欽定四庫全書薈要卷二萬二百二十九

集部

明文衡卷七十六

明 程敏政 編

神道碑

故文淵閣大學士兼左春坊大學士贈榮祿大夫  
少師禮部尚書謚文穆胡公神道碑銘

楊士奇

太宗皇帝御天下二十有三年文武之臣各展其才能  
達諸事功若竭誠効力始終不渝者其身雖沒所以寵

眷之率有進而不衰其文臣遭遇之盛者文淵閣大學士兼左春坊大學士胡公尤著者也公初以進士第一為翰林脩撰階承直郎又明年太宗皇帝入正大統陞侍講踰月改侍讀進承德郎永樂二年陞右春坊右庶子階奉議大夫仍兼侍讀四年進翰林學士兼左春坊大學士階奉政大夫進文淵閣大學士仍兼左春坊大學士又三年得疾且劇上數命太醫集衆醫之良者往視日遣中使問疾既卒上悼嘆不已命工部具棺禮部

賜祭者再贈資善大夫禮部尚書謚文穆國朝文臣有  
謚自太子少師姚公廣孝與公始也又命官給舟還其  
喪命有司治祠墳時仁宗皇帝監國南京公之喪過焉  
遣官臨祭賜賻甚厚葬畢其子入謝官其長子種為翰  
林檢討仁宗既嗣位追念公舊人加贈榮祿大夫少師  
禮部尚書遣官諭祭且厚賜其家公遭逢二聖恩備始  
終何其愈久而愈盛也公居官敬慎在上前承顧問應  
對必盡誠必據理而忠厚為本未嘗及人過失事于奉

旨制勅視草卽有所見必具可否以聞多見采納所撰  
進文字上知出公筆輒稱善所奏對語及所治幾務退  
未嘗出口雖親厚不敢私涉有問蓋自守之嚴有素事  
太宗皇帝十有七年凡巡幸北京親征北寇翰林率公  
與楊公勉仁金公幼孜在扈從信任甚篤禮部郎中周  
訥建請封禪羣臣亦多言此太平盛事上皆不聽時獨  
公之言與上言合旣退作封禪頌奏之丁母憂召還上  
問百姓安否對曰安但郡縣窮治姦惡外親為民厲遽

詔罷之其兼春坊也小心盡誠多所裨益故尤為儲君  
所厚而沈靜謙約以滿為戒未嘗干人以私人亦無敢  
以私干之兩考京畿鄉試四為廷試讀卷官鑒別公明  
奉勅修高皇帝實錄及五經四書性理大全書皆為總  
裁志於扶植名教獎掖善類果于義事于利不苟取與  
未嘗一比匪人所與交必輔之于善不善去之不復顧  
小人有不滿公者屢造言毀之賴上深知之不聽遽黜  
毀者而公自執愈堅意度蕭散雖身處榮祿未嘗一日

志山林幽澹閒遠之趣公退閉戶讀書賦詩而已初名  
廣廷試傳臚更名靖永樂初復舊名其字光大其齋居  
名晃菴因以為號公十數歲喪父已有志問學內浸漬  
其母訓外則日受從祖子貞先生之教故德器不凡居  
家篤倫誼處鄉曲恂恂執恭讓旣冠薄遊閩中閩之前  
輩君子率忘年與交歸而從黃伯器先生講論得所歸  
宿之地而日進焉其學博究經史百氏下逮醫卜老釋  
之說亦皆旁通而用志性命道德之旨晚益有造詣為



文援筆立就頃刻千百言沛然行雲流水之勢賦詩取  
適其性情近體得盛唐之趣工書法行草之妙獨步當  
世四方重其文翰求者日接踵戶外雖無厭倦意然非  
其不苟予其卒以永樂戊戌五月八日春秋四十有  
九其先自金陵徙廬陵宋忠簡公銓其十二世祖也曾  
祖鼎亨祖彌高父子祺累官延平知府母吳元進士永  
豐縣丞師尹之子永樂中贈公父翰林學士封母太宜  
人公娶夏初封宜人洪熙初進封夫人子男三長卽種次

穆次穗女四長嫁陳年次嫁解禎亮次嫁宋懷孫男六女七所著文章有晃菴集扈從集若干卷公與士奇同郡同官知契最深未卒前二年有後死則銘之約既卒其孤又奉臨終之命索文刻墓石嗚呼士奇先公生五年豈謂竟銘公墓哉蓋今九年乃克成之銘曰

經國所資文武並施維武以靖維文以治巍巍太宗統御九有任武暨文如左右手公職詞垣十有九禩秉恭執勤司帝之制玉冊金簡天章龍文光華日星敷宣帝

仁萬幾燕閒清問前席公所入告惟帝時懌公所蓄志  
寬惠被下沕穆泯焉密贊鴻化春宮輔德平直之行二  
聖惟明燭鑒公誠好文之朝儒林之首人聳其瞻公眎  
無有泊虛之存簡肅之度彼其何心有好有惡仲尼有  
言善者好之善有好公沒思不衰寵章駢蕃賁終猶始  
始終之全曠代其幾金螺在左文川在右埋壁有光上  
貫牛斗墓道之碣為尋有多最行琢辭來者是儀

少保戶部尚書贈特進光祿大夫太師謚忠靖

夏公神道碑銘

楊士奇

公姓夏氏諱原吉字維詰其先家于饒州曾祖復祖希政  
元末為湖廣行省都事兵亂死之考時敏為湘陰縣儒  
學教諭遂家湘陰公自幼端厚好學年十三教諭公  
沒益知自勵母夫人廖守節教子公終父喪卽出教里  
塾取束脩以資養而率其二弟恭侍婉愉得母夫人懽  
心出入鄉閭其老長皆忘年賓禮之時已負鉅人度喜  
怒不形里少年嘗被酒侮慢公里人共擊之詈之曰汝

小人不知鄉有君子耶有鬼物白晝附人言禍福驚動里中或強公往觀卒無所言他日復有言或問之故曰夏公端人吾不可以近公一無所動心洪武庚午歲以詩經選鄉貢入太學遂擢戶部為四川司主事授承直郎進承德郎曹務叢脞凡倉庾府帑之出入簡牘之著悉有條理同官後至于事有未通者咸以質公日環左右公雖紛冗必為之盡心蓋人人德之如師陞戶部右侍郎授嘉議大夫巡撫福建所過郡邑考察吏治咨訪

民隱公明寬大人咸悅服太宗皇帝入正大統轉左侍郎逾月陞戶部尚書授資善大夫永樂初蘇松諸郡大水命公往治發浙西兵民十數萬疏決壅滯自松江黃浦東北以達于海水患乃息而撫恤曲當人不言勞又撫綏其飢民奏發廩三十餘萬石賑之散給有方民賴以濟進資政大夫初建北京採宮殿材于東南命公自南京抵北京督視運送給以錦衣衛官校且命有不率命便宜行事公于號令中備矜恤之意人人效用太

宗巡狩北京公預扈從命兼行在禮部都察院事歲  
餘車駕親征北邊今上以皇嫡長孫留守北京命公輔  
導庶事修舉京師肅然太宗還良喜賜公鈔千緡綵幣  
四表裏羊酒鞍馬自是屢奉命侍今上有司奏公與吏  
部尚書蹇公歷官九載皆賜勅嘉獎有淳良篤實如古  
名臣之諭太宗親宴之別殿無幾賜誥命追封祖考皆  
為資政大夫戶部尚書祖妣為夫人封母為太夫人重  
修太祖皇帝實錄命公監修書成賜鈔織金文綺衣文

綺表裏北京宮殿成奉勅召仁宗皇帝及今上于南京  
二聖喜公至賜宴勞及鈔白金鞍馬元人復犯邊太宗  
皇帝將親征公言今邊儲不足請遣將無煩六師忤旨  
罷官仁宗皇帝嗣位即日復公戶部尚書公以母喪未  
終辭仁宗曰國家不幸有大事正朕與卿等協心比力  
之時如卿以親喪辭則朕亦未當在此公乃不敢復言  
遂加少保仍兼戶部尚書賜玉帶令上正位東宮加公  
兼太子少傅少保尚書二職如故賜誥命追封曾祖祖



考皆為榮祿大夫少保兼太子少傅戶部尚書曾祖妣  
祖妣妣皆一品夫人賜銀章一其文曰繩愆糾繆且諭  
公曰朕有過舉卿但具奏來以此識之朕不難于從善  
賜鈔萬緡御用米二十石胡椒二百斤公感知遇之厚  
鞠躬小心靡或不盡修太宗皇帝實錄命公監修仁宗  
皇帝崩時今上監國南京至則喪禮及即位之儀皆具  
皆公一人所預定上既嗣大位公以舊輔尤重倚注公  
亦孜孜惟謹寵賚日盛修仁宗皇帝實錄仍為監修庶

人高煦反上親率六師擒之公預扈從還賜白金文綺等物甚厚賜銀圖書一其文曰含弘貞靜蓋褒公之德云明年扈從巡邊旣還上念少師蹇公及公等四人者皆春秋高欲優逸之賜勅嘉勞命輟職務而仍其祿朝夕侍上備顧問謀議而恩遇益厚兩朝實錄成賜白金織金羅衣文綺表裏鞍馬賜宴明旦入謝暮歸第得疾遂薨宣德五年正月二十七日也壽六十有五歲上聞訃震悼遣禮部尚書胡濙賜祭贈特進光祿大夫太

師賜謚忠靖賻鈔萬緡勅有司營喪葬官其子瑄為尚  
寶司丞仍復其家朝臣自公侯貴戚下至郎曹將校咸  
往弔祭衛卒巷氓亦有嘆息至流涕者公天性至孝友  
其弟原啓原禮皆厚原啓沒愛其子如子讀書鄉校時  
教諭史九韶雖非授業師遇之必拜雖貴不變旣貴九  
韶陞教國子月恒分之祿九韶將老朝廷從公請命致  
事與人交久而敬平生故人在患難率賙給之遇士之  
貧者振之有顛躓失所者援之德雖微必報而未嘗存

怨惡心接人溫然處事善善長而惡惡短襟宇瀟深閼  
廓不見涯涘嘗有從隸污公金織賜衣懼欲逃者曰污  
可浼何懼為有吏壞公所寶硯石匿不敢見公召吏諭  
之曰物皆有壞吾未嘗惜此慰遣之于時卿大夫雅量  
推公第一知者蓋比公于王子明韓稚圭之度其在上  
前所言必歸仁厚臨政必酌大體其預宥密雖泯然無  
迹蓋有陰受其德者矣故不間貴賤疏戚識不識皆知  
其為善人長者喜為詩四方士重公名得其一篇一詠

藏以為榮公配鄭氏有賢德再封皆夫人子男三琬瑄  
瑾女一嫁虞珣琬與虞氏女皆先卒公卒之三月歸葬  
湘陰其家以墓碑屬余余與公同朝三十年晚益親  
厚相知又嘗為余道其平生余豈意遂志公之墓耶  
銘曰

沂夏厥初以國為氏衍于會稽縣縣厥系太末之邑後  
來徙居暨唐中和復徙于番懿夏之世逢掖其服詩書  
有承德善有績轉鄂而潭自公祖考積厚必發公奮起

紹燕歌鹿鳴來與計偕官任其賢政用其才繇司徒屬  
暨掌邦教寅恭小心寬仁允蹈叅決大義洊任重負不  
亟不徐雍容雅度如彼喬嶽截焉弗移其氣默運澤潤  
良多祇事列聖旣四十載險夷一道其烏几几國有老  
成堂有柱石胡不憇遺當寧興惻旣榮且哀隆隆寵  
光於乎忠靖沒世不忘

奉天靖難推誠宣力武臣特進榮祿大夫柱國  
太保陽武侯追封鄴國公謚忠武薛公神道碑

銘楊士奇

宣德五年五月太保陽武侯薛公奉命城隆慶永寧赤  
城獨石竣事將歸以疾聞上遣中官以御醫往視且賜  
勅諭勞至京猶力疾入見上慰諭再三旣歸第日賜御  
藥遣中官臨問無幾竟不起七月廿三日也訃聞上震  
悼親為文祭之追封鄆國公賜諡忠武詔有司治喪葬  
凡喪葬之儀皆優等蓋特恩云公諱祿姓薛氏世家山  
東膠州之新興社曾祖考諱安妣劉祖考諱大妣金考

諱遇林妣張公兄弟六人而公第六自少傑特有大志  
未冠籍戎伍上官皆奇之從北征金山及哈勒哈之地  
又從征伊勒都山噶爾布哈等處自是屢出西北二邊涉  
萬里而還太宗皇帝舉兵靖內難公首從義旗攻九門  
克薊州遵化援密雲攻雄縣追敵鄭州咸奮勇先驅以  
一當百戰真定公生擒敵左副將軍駙馬都尉李堅超  
陞燕山右護衛指揮僉事賜白金文綺從援永平攻下  
大寧富峪會州寬河時南兵已圍北平城公還先遇其



哨騎薄戰敗之車駕繼至從戰鄭村塢敵大敗陞指  
揮同知從克廣昌蔚州攻大同率兵前哨獲敵人馬遂  
從南征大戰白溝河追奔至濟南陞指揮使從克滄州  
大戰東昌公以五十騎前哨遇敵兵數百與戰敗之獲  
馬三十餘匹敵悉衆來追公復奮戰大敗之獲馬二百  
餘匹敵于威縣及深州伏兵以要旋師皆擊走之從戰  
夾河大捷戰滹沱河右軍力屈公率衆馳赴之出入敵  
陣數十合戰敵敗走公追至夾河斬馘無算獲馬五百

餘匹明日戰單家橋公馬蹶為敵兵所得拔刀斬敵兵  
復上馬督戰遂敗敵將平安軍以次攻下順德大名彰  
德及攻西水寨公生擒敵都指揮一人斬獲尤多從攻  
東阿東平汶上皆下之繼戰淝河大店小河汴隄靈壁  
率勇先諸軍遂渡淮渡江從車駕入京師太宗皇帝為  
臣民推戴既正大位論功行賞陞驃騎將軍後軍都督  
府都督僉事以其官秩贈三代永樂六年陞都督同知  
八年從車駕北征至玄溟河以功進榮祿大夫右軍都

督府右都督兼左軍都督府事以其官秩加贈三代時  
四方選至幼軍數萬悉命隸公操習十二年從車駕  
北征十五年初建北京宮殿命公董營繕十八年成  
加奉天靖難推誠宣力武臣特進榮祿大夫柱國封陽  
武侯食祿千五百石追封其三代皆侯爵賜誥券二十  
一年從車駕北征還奉命討捕湖州叛寇二十二年復  
從車駕北征是年八月仁宗皇帝嗣大位加公太子太  
保子孫世襲侯爵奉命巡北邊適敵寇雲州公率兵追

至大松嶺斬獲甚衆事聞賜勅嘉獎遣中官及鴻臚卿  
卽軍中勞之旣還賜白金鈔幣加歲祿五百石洪熙  
元年佩鎮朔大將軍印率師巡北邊宣德元年庶人高  
煦反車駕親征命公為前鋒先一日圍其城罪人旣  
得留公撫綏城中軍民還賜銀幣甚厚明年秋從車  
駕巡邊出會州解后北師塞下與戰敗之生擒其酋斬  
獲其餘衆遂鎮薊州永平冬還賜銀幣加厚四年率  
師護兵餉開平者再五年春佩鎮朔大將軍印巡邊至

奇黃嶺遇敵拒戰悉斬之盡收其家口孳畜陞太保  
賜鈔幣居三月董築城之役蓋從公之言以便戍守公  
平居無事未嘗忘危每計邊務言之疊疊或謂其瑣屑  
者終不為變蓋其志奉國惟恐不盡為將勇智兼備常  
先事籌畫用心之至以夜繼日故所嚮成功未嘗敗北  
間一二臨陣中矢石裏創赴關有進無退其率師所過  
紀律嚴明秋毫無犯而撫恤士卒人人歸心若董繕作  
規置有方力不煩費功率堅久人亦罕及蓋一代之興

必有一代之臣公祇事三聖涉歷多用志篤鞠躬盡瘁  
以效臣職故能建功國家流光簡冊致身貴富垂慶後  
昆其非古名將之流而今之不可多見者歟公壽七十  
有三年其配李累封至侯夫人子男三長勲先卒次某  
次某孫男三長誠先卒次某次某以是年十月三日葬  
公于某鄉某原銘曰

明聖之興有命自天必有輔翼名世之賢氣機翕會雲  
龍風虎有勲有烈左文右武桓桓薛公始奮從義大呼

迅馳金戈鐵騎智明幾先勇蓋萬夫疇其膺之折朽  
摧枯宗社載安功書冊府在帝左右股肱心膂公于事  
上一誠不貳知竭臣職死且無怠公于馭衆有紀有綱  
撫如春和令如秋霜歷事三聖麟衣蟬冠廷有老成國  
有屏翰丹書鐵券傳襲來裔公如長城曷不百歲英  
靈升遊九原在此太史作銘式昭無已

明文衡卷七十六



欽定四庫全書薈要卷二萬二百三十

集部

明文衡卷七十七

明程敏政編

神道碑

奉天翊衛推誠宣力武臣特進榮祿大夫柱國  
追封平江侯諡恭襄陳公神道碑銘

楊士奇

太宗皇帝初自北藩靖內難至江上都督陳公瑄具舟  
迎濟內難平上正大統錄功賜公奉天翊衛推誠宣力

武臣特進榮祿大夫柱國封平江伯賜誥券陳氏家合  
肥其先世具余所著其先公墓碑公字彥純自少穎敏  
不凡好善惡惡內篤孝行洪武中侍父官成都習兵畧  
精騎射以武臣子選侍大將嘗從出郊遙望孤雁雜鵝  
羣命衆從者射不中最後命公發一矢斃之有鵠翔於  
上命公射應弦而墜自是屢試皆奇中衆大服而公不  
自為能朝廷命總兵者作蜀府宮城遣將伐材於山所  
行失律且材不中度又所經瘴地士多死總戎察公可

用遂命之公善撫綏明號令別取善道七百里以入先期而還士不病所得材皆適用總戎者嘉之又命董繕作具有條理遂從征南番巖州中亭及散毛鎮南咸建勞績代父職為成都右衛指揮同知父坐舊累謫戍遼陽公伏闕奏請代行特詔父子並免復職衛卒數輩饗詖狙詐狹制上下為衆患公次第悉去之善類以安從征越雋討建昌酋長伊埒特穆爾踰梁山平天星寨破寧番諸蠻駐西河口諭降夷人數千從總帥復征鹽井

平三山寨及小伯夷進攻卜木瓦寨據要害立堡以斷賊路官軍分三隊進公居中已而左右兩隊弗支奔還公所統僅百餘人冒險先登賊數千圍公公下馬率衆且射且斫賊疲稍却公亦傷足裹創進戰自己至酉賊敗走公全所統而還復從征餘寇賈哈喇時寇衆數萬據嶮以拒官軍分三道公軍後進由番西涉打中河得間道乃出奇兵作浮梁渡河既渡撤梁以固士志遂壓寇境寇憑嶮迎敵一日十三戰奪其嶮明日復力戰凡

七合寇大敗遂入其壘簡銳卒出哨令望見前軍旌旗  
即舉砲俾知己敗寇仍遣五百軍斷寇走路寇窮出降  
械送賈哈喇京師撫輯其餘衆公及麾下加被陞賚從  
蜀獻王巡邊招撫邊夷兼理茶馬之政邊人悅戴灌口  
都江堰壞民苦水患公修其隄防躬督工作為堅久計  
矜恤無告出貲置義田二百畝於成都積所入租凡貧  
不能衣食不能婚嫁及死不能歛葬者皆給之會雲南  
兵征百夷以功陞四川行都司都指揮同知遂進右軍

都督府都督僉事太宗皇帝知公才可任時北京軍儲不克命公歲董運百萬石道海給之公措置井井創建百萬倉於直沽尹兒灣城天津衛籍兵萬人戍守公善任使均勞逸秋毫無取於下凡漕途姦弊掃滌一清漕舟所經海島夷人畏憚官軍悉閉匿公下令俾出為市而遣官監臨平其直軍無敢譁人兩便之舟還值倭寇劫沙門島公率衆追至朝鮮境上焚寇舟殆盡寇以殺溺死者甚衆奉命率舟師於閩海備倭寇者三海溢冊

沒隄岍起揚之海門歷通泰北至鹽城凡八百里奉命以四十萬卒修之航海至者茫洋莫知所停泊往往膠淺公於太倉相可泊處以二十萬卒築高丘二十丈延亘十里為表識衆便之稱寶山事聞上親製文樹碑焉既建北京罷海漕浚濟寧臨清河通南北往來仍屬公董餉運公建議造淺艦二千艘初歲運二百萬石為之有方後增至五百萬石國用以足若䟽清江浦引水由管家湖入鴨陳口達淮以免淮河風濤之患就管家湖

築隄亘十里以便引舟浚儀真瓜洲二埧湖港之堙鑿  
呂梁徐州二洪巨石以平水勢築沛縣刁陽湖濟寧南  
望湖長隄開泰州白塔河通大江築高郵湖隄隄內鑿  
渠亘四十里以通舟南北造梁以便陸行自淮至臨清  
相水勢高下建牖四十有七以時啟閉皆舟楫通行永  
遠之利於淮濱作常盈倉五十區以貯江南輸稅於徐  
州臨清通州皆建倉以便轉輸慮漕舟昧河深淺自淮  
底通州濱河置舍五百六十八所舍置卒俾導舟可行



處緣河隄鑿井樹木以便夏月行者凡於事慮之周而

為之果仁宗皇帝初臨御下詔求言公首言七事大概  
謂南京國之根本宜為久遠鞏固之計選將益兵以嚴  
守備長民長兵皆宜擇賢能然後政舉而下不失所賢  
能在推舉推舉在覈實乞選朝臣之公正者分巡天下  
考察百司政事得失進廉能黜貪鄙則官得人而治可  
興今府州縣學教官多不得人乞令風憲考察罷黜別  
選令中外軍伍多缺蓋由所管頭目私役擾害不勝致

其逃逸乞勅都府兵部都司嚴切禁約就行清理老疾者令戶丁代逃逸者責限追捕戶絕者驗實除豁伍籍又邊防之要在兵食足近歲如開平等處城不足兵兵不足食所守何由完固乞選武臣之有方畧者授以精兵足其衣食給之堅利器械俾日教習如有沃壤令兼務耕守今漕運惟江西湖廣浙江及蘇松諸郡去北京甚遠漕河又有洪牐淺凍之阻往復踰年雜費數倍正糧上逋公租下妨農務乞自今令運於近便淮安徐州

等處收貯別令官軍運至北京則民力可蘇農務不妨  
各處官軍每歲漕運畢財力殫乏到家又修理壞船運  
來歲糧勞動可憫其所管頭目又加別役以重困之乞  
行禁約今後漕運軍士不得再有別役馬船快船惟二  
三百料者可行於漕河所載不過五六十石每船已有  
額設水夫今又於緣河拘集軍民聽候其至接遞聽候  
日久衣食艱難有至行丐者乞自今罷之上覽奏嘉嘆  
命有司咸即施行賜勅獎諭有老成忠愛之誠之褒加

之重賚賜誥追封其曾祖省三祖重一考聞皆平江伯

曾祖母孫祖母朱嫡母王生母王故妻湯皆夫人命子

孫世襲宣宗皇帝臨御命公鎮守淮安兼督漕運公至

察宿弊之為民厲者悉革之豪猾姦宄皆斂避境內以

寧時已嬰疾而躬勤旦莫靡有滯事疾間入朝深被嘉

勞賜宴賚還至淮安無幾疾復作上聞特勅勞問時子

儀在侍衛令挾醫馳驛往侍竟薨宣德癸丑十月十一

日也春秋六十有九訃聞上悼嘆輟視朝一日追封平

江侯諡恭襄賜祭命工部營葬公為人閭閻英毅弘度  
偉畧稠人廣會譚論疊疊倫輩推服公餘披閱載籍考  
知往古成敗治亂之故喜近逢掖士時相講議善交際  
能推利為義所至以濟人為心多所建置人用德之不  
忘家有樂善堂恒舉鄒孟氏仁義忠信樂善不倦之語  
以勉子孫配某氏封夫人子男五佐襲平江伯後公數  
歲卒次儼次儀今為勲衛好文事精武畧次倫次侃女  
三李芳江陰衛指揮同知張英其壻也一未行孫男三

裕今襲平江伯祐裸女七公葬以薨之明年三月墓在江寧縣大山之原余與公同朝三十餘年相知且好於是儀以狀求著神道之碑故按狀敘而銘之銘曰

繫公挺出何桓桓武蕪勇智追前聞材藝夙試卓寡倫  
我之三品承考勲蠻溪獠峒獫狁羣負嶮弗擾寧且趨  
公奮掃刮迅拔塵湔滌腥穢寧邊民有截譽望齊峨岷  
歛徵來東衛宸垣遭承興運效駿奔錄勞䟽封昭鴻恩  
貂蟬鞶玉衣繡麟報賜志企古蓋臣單心畢慮靡夕旰

滄溟茫洋渺涯津歲漕萬艘奄然臻有梗於海威赫震  
斬鯨戮鱷焚甲鱗崇表海岬亘長雲雲章龍彩天垂文  
南賦北貢艱以辛踰淮歷濟底天津疏堙鑿堅劬且勤  
坦行如砥戚者忻猗嗟公篤孝與仁厥施諸時績弗泯  
愛國亦有嘉謨陳功載冊府被後昆大江之陽歸有墳  
太史銘之昭不刊

封榮祿大夫少保戶部尚書兼武英殿大學士  
黃公神道碑銘

黃羸姓顓頊之後以國為氏勲業文行代有聞者永嘉  
之黃自宋御史檢法袞以科第起家令緒有傳世篤儒  
業檢法孫修職郎諱適道生元明正書院山長諱南一  
山長生松陽縣學教諭諱應發教諭生諱通娶屠氏生  
公諱性字思恭自幼穎悟不凡蚤喪父祖母劉躬自撫  
育遣從學明師時已卓然有立志讀書必尋究大義十  
五鄉長老試所業命賦新竹大見賞異而操行清潔元  
季兵亂方國珍竊據溫台署官屬蟻附之徒率勢齟赫



赫動閭里或勸公仕正色叱之遂裹足不出屬歲大侵家益落躬儉約以率下而養親必豐國家既定宇內家始復振推其餘以濟親戚鄉黨者率視為分內事內弟王時中孤寡依公公資遣之學後升太學生公皆輟已資之時中既授官坐事當沒其家有司以同籍併沒公家公叩有司求得先祠神主及先世傳文以付其親戚曰保藏之如黃氏先德未泯吾當還則此不可失也而求檢法所受告身或言燬矣大慟幾絕既至京白其情

於朝得釋歸而告身實未燬亦復則又大喜曰復此萬金不足重也公於學自幼至老不倦閒居潛心載籍喜為詩不事雕琢務以理勝遇名人制作有會意者手自抄錄晚亦喜譚道學嘗書邵子安樂窩吟置齋壁時諷詠以自適永樂十年以子淮貴封奉政大夫右春坊大學士時淮侍仁宗皇帝監國屢問公安否嘗賜瓊玉膏一器洪熙初進封榮祿大夫少保戶部尚書兼武英殿大學士淮奏請分少保祿給於鄉以供養從之天下聞

而榮豔焉於是公年已九十鬚髮半白而齒落復生雖  
重聽而目益明步履强健前二十年嘗預作壽藏是旦  
甘露降其前之松柏識者以為公之壽徵至是而驗公  
雖貴益惇謙謹雖五尺童子接之以禮溫裕有容犯未  
嘗校隣惡少嘗侵公䟽地公弗校而侵不止有譏公悞  
者公若罔聞惡少後侵官地有司將治之而詢諸其隣  
之老公為䟽其實而薄其罪人皆服公之量公已進封  
一品其友之子有官於朝而秩平者過家焚黃數於會

而位公上里人交誚之而公怡然不一毫在意閩陳興  
祖清尚士也與公厚善客死永嘉公歛葬之盡禮而繪  
像時展對焉其交篤誼類此性簡澹無他嗜好所畜惟  
經籍法書名畫及古器物有就鬻者倒囊不靳不嗜酒  
而喜賓客有過者必傾寫盡歡淮謝病歸日侍甘旨公  
益樂時攜賓客載小舟嬉遊山水之間翛然物表也所  
作詩文有靜菴集八卷藏於家一日得疾手書數事付  
淮大要以報君上為重遺命喪葬循朱氏禮而屏斥浮

屠老子法語訖而逝宣德六年十一月五日也享年九

十有三訃聞上遣官賜祭命有司治塋廷臣自師傅六

卿以下皆致祭配王氏里儒家貞淑秉禮既歸黃氏蚤

夜躬勤女事佐裕其家凡所制財用之宜井井有條理

尤謹先祀睦族姻而愛其庶出之子孫踰於已出永樂

壬寅十一月十三日卒享年八十有六初封宜人後贈

夫人其卒也朝廷遣官賜祭命有司營塋子二男一女

長男濟庶出次即淮及女皆王夫人出淮洪武中舉進

士由中書舍人累陞右春坊大學士通政使少保戶部  
尚書武英殿大學士立朝有侃侃之節歷事列聖皆為  
上所信任今以疾歸第女適王士昌士昌蚤卒無子誓  
守節不更嫁孫男五樂先卒荼蓼采槃女三葉璣王宜  
嘉其壻也一未行曾孫男四旭暉珣瑜公與夫人合葬  
邑大羅山之原於是淮具書以前翰林檢討潘畿所述  
事狀使來京師求書墓道之石士奇與淮同官三十年  
辱公知有素不敢辭敬次第書之而系以詩曰

滄海之堦清浙之東奕奕永嘉為文獻邦出者奮庸處  
者求志仕止之義代有聞世邦之黃氏其來逾遠當宋  
紹興臺幕有袁秉德執義不附權姦卒用裕後而今桓  
桓公其世嫡曷潛在下抱貞含和允續乃祖紛其饗諝  
公獨引恬紛其矜高公獨履謙五采翾翾翾雲漢帝  
嘉所生龍光輝煥崇秩重祿玉帶朱衣雍容丘園消搖  
期頤邦有壽俊平世之瑞亦有賢淑德人之配青山鬱  
磐雙壁合藏毓祥垂祉百福其昌

贈驃騎將軍左軍都督府都督僉事王公神道

碑銘

宣德十年加贈左軍都督府都督僉事王瑜之祖彥達  
考銘皆驃騎將軍左軍都督僉事祖妣黃妣成皆夫人  
封其繼母茹太夫人於是瑜求余文勒碑其考之墓用  
昭上恩於永遠按王氏初出太原宋諱源者為滄州學  
官因家焉其子曰福綿自滄徙泗州娶房氏一子即達  
又徙山陽三子銘其仲也字銘甫洪武初從征伐以功



長五十夫暨老而瑜代之瑜謂余曰先考天性質實尚  
德務仁蹈履率正而篤於教子恒言忠孝人道之大端  
人而昧此不可以立於天地之間瑜不敢違情瑜非承  
籍先公之德不有今日幸執事之惠畀之也余與瑜同  
朝久蓋素知之始瑜既代又選隸趙簡王護衛時留京  
師一日其護衛指揮孟賢等十數輩潛結造邪謀篡奪  
布置已定簡王實不聞也瑜親戚有與謀者瑜竊聞之  
力諫止不聽遂奏發之詔捕賢等悉獲之得其偽詔書

及邪謀本末賢等皆伏誅陞瑜遼海衛正千戶遂進錦  
衣衛指揮同知推恩三代贈其祖若考皆懷遠將軍指  
揮同知祖妣妣皆淑人封其繼母太淑人後陞瑜都指  
揮僉事署左軍都督僉事佩漕運印充左副總兵董江  
南饟運其蒞事勤敏持操廉潔秋毫無取於下夙夜顙  
顙志在奉國遂實授都督僉事瑜之能子要之本於銘  
甫之能父也自瑜效忠十餘年致位二品膺受重寄榮  
及祖考天之所以報施厚矣凡人之善患無諸已誠有

之天道未嘗爽其報也銘甫之顯庸雖不在其躬而必  
在其子榮命雖不見諸生前而必徵於身後天之道豈  
不信哉銘甫四子長琳次琮次瑜次瑄八孫堂堅壘賢  
真頓顯賓銘甫生元至正辛丑五月十日沒於永樂壬  
寅十二月八日春秋六十有二葬海州城北沙村之原  
銘曰

南山之植根本深厚挺發為材凌切雲表宜柱宜梁廟  
堂之需宜艦宜舟濟海與湖王氏之宗善仁代有有沿

襲焉歷祖暨考篤鍾於嗣秉志桓桓維忠維誠以事大  
君發摘兇慙爰清氛曠帝錫寵嘉曰旌汝義崇秩豐祿  
式賁厥躬沂厥祖考申顯褒封厥考維良允蹈於德教  
成於家致時赫奕歸焉佳城其藏在此春秋來拜振振  
孫子

開國輔運推誠宣力武臣柱國武定侯贈營國  
公諡威襄郭公神道碑銘

楊榮

洪惟太祖高皇帝龍飛淮甸應天順人芟刈羣雄戡定

海內一時智勇材力之臣感會風雲效其忠勤輔成帝  
業開千萬載太平之運奇勲偉績鏗鉤振耀勒銘鼎彝  
垂光竹帛與國家相為無窮猗歟盛哉予嘗叨職國史  
竊觀開國勲臣其間能身躋壽考世為貴戚子孫享有  
顯爵久而益盛者不數人豈非其存心之仁與積累之  
厚有間耶若營國威襄公蓋足徵焉公姓郭氏諱英臨  
淮人生有異徵沉毅多智身長七尺膂力過人尤精騎  
射年十八從太祖起義兵甚見親信每令直宿帳中取

徐泗滁和采石太平建康鎮常寧國諸郡屢立戰功上  
嘗以郭四呼之上親征偽漢陳友諒大戰鄱陽湖相持  
連晝夜公時金瘡未瘳力疾鏖戰敗賊於禁江口已而  
友諒中流矢死有言公之功者上問之公曰天威神算  
臣何力焉上益重之時友諒子理復立於武昌進軍攻  
之其將陳僉同者驍捷善槩馳入中軍帳下上方坐胡  
牀遽呼公曰郭四為吾殺賊公持鎗躍馬奮臂一呼賊  
應手殞墜上解所御赤戰袍衣之曰唐之尉遲敬德不

汝過也授驍騎衛管馬軍千戶從征襄陽克淮安鳳陽  
安豐陞宣武將軍驍騎左衛指揮僉事洪武元年戊申  
從大將軍徐公北定中原下齊魯克汴梁平河南取元  
都破潼關彰德廣平所至有功初大將軍遣公取通州  
公距城三十里為營深溝高壘為持久計衆請速攻之  
公曰吾師遠來敵以逸待勞攻城非我利也宜出其不  
意破之翌日大霧公以千人伏道傍率精騎三千直抵  
城下元將諤斯巴國公帥敢死士萬餘張兩掖而出與

戰良久公佯敗彼乘勝來追伏兵中起截其軍為兩道  
斬首數千級擒元宗室博囉梁王遂克通州元君乃北  
遁克永平真定定州生擒守將湯同僉復從平章常公  
取太原守將王保保軍於城西公憑高望之謂常公曰  
彼兵多而不整營大而無備請夜劫之常公深然其計  
遣五十騎伏城東十里以舉火鳴砲為期至夜公率十  
餘騎潛入其營舉火鳴砲伏兵亦舉火鳴砲常公引兵  
繼至鼓譟之聲相接保保軍大潰自相屠戮乃棄城遁



下興州大同至沙淨州生擒偽將竹平章渡河取鹿臺  
西安鳳翔鞏昌追敗賊將賀宗哲於亂山庚戌陞本衛  
指揮副使從征迤西克定西討西夏察罕諾爾撫安呼  
沁平章沙淨州復叛討平之克登寧州斬首二千級獲  
牛馬數千陞昭勇將軍本衛指揮使賜金龍衣一襲辛  
亥陞驃騎將軍河南都指揮使將赴鎮皇寧妃公之女  
弟也上遣至公第餞之且謂公素清儉賜白金三十  
鍰廐馬二十二匹時河洛新罹兵燹邑井蕭條居民艱食

盜賊充斥公宣布威德綏輯流亡申寬條明賞罰遠邇  
來歸者日以千計未期年戶口倍增境內大治丙辰移  
鎮北平河南士女不忍其去遮公馬數十里不得行甚  
至泣下既去為立生祠北平初定羣醜反側不寧公開  
示誠款諭以理亂禍福人心遂安元左丞何允中等聞  
公之德來降者凡九千餘人上遣使勞以上尊羊馬授  
龍虎將軍北平都指揮使賜誥命逾四年召還京進大  
都督府僉事更定官制改前軍都督府僉事灰山賊反

承命討平之賜馬七匹辛酉從潁川侯傅公征雲南既至命公及都督陳桓胡海分道進討道多險隘諸將欲深入公曰破敵貴先聲攻取必自近始舍近趨遠豈策之上耶遂先攻赤水河路距河二十里為營時久雨河水暴漲公曰賊恃水漲不意吾濟下令諸軍斫木造筏夜半濟河比曉賊始覺遂大潰生擒烏撒并阿容諸蠻由是雲南諸賊破膽進攻曲靖陸梁州關索嶺及偽石元帥山寨皆克之至江川椅子寨寨依山公先遣騎兵

五千攻其前賊空寨迎戰復以精騎數百擣其後斬門而入火砲連發烈焰漲天賊乃亂悉破滅之進攻大理金齒降其偽官段平章攻安寧州賊將布哈特穆爾棄城走破富民縣山寨攻靖守州蠻七寨一日夜破之攻牢撞山寨取仁德府破哨店山寨圍姚安敗賊將李自久平蒙化州鄧川州破三營復光寨過金沙江攻北勝府生擒賊將高生平麗江府平津等州前後斬首一萬三千餘級生擒二千餘人收精兵人馬數萬船千餘艘

蠻民降者數十萬戶雲南諸路平論公功進爵開國輔  
運推誠宣力武臣柱國武定侯賜誥券食祿二千五百  
石子孫世世承襲乙丑加靖海將軍鎮守遼東丁卯同  
大將軍宋國公馮公討北寇納噶楚降之師旋賊將追  
襲之公與戰創傷左脇箭復中右脇公佯呼賊傷吾甲  
我衆益奮連戰數十合賊遂却已而進征虜右副將軍  
仍鎮遼東戊辰出討北寇至捕魚兒海邏騎偵敵營不  
遠公乃令諸軍少憩飲馬銜枚卷甲倍道而馳直抵敵

營其王覺乃率十餘騎潰圍出其將曼濟太尉來拒我師公手刃之獲兩營所積金寶珍玩圖書降其衆五萬餘人生擒賊將約約司徒納木曩嘉卜太尉繖固達勒衮布達拉王子等四萬餘人馬駝萬五千匹牛羊輜重無算師還賜白金千兩鈔八百錠綵幣四十匹已巳上以天下無事且憫諸將老欲保全之厚加賜賚遣歸其鄉公亦就遣庚午獨召還京上賜坐與語歡甚命統禁兵及在京諸軍蓋上春秋高知公忠謹特倚重焉辛未以北

酋阿扎克實哩寇邊命公討之獲其人口孳畜逐北至鴉  
寒山而還丁丑川陝寇發勢張甚上顧曰非卿無能勝  
其任者授征西將軍印討之至沔之後河生擒賊首高  
福興及黨四千餘人公䟽其同謀者請誅之脅從者乞  
勿治且言有司不恤民宜正其罪上可之永樂元年癸  
未二月十七日卒於家享年六十有九訃聞太宗文皇  
帝為之震悼輟朝二日遣官致祭賻卹有加贈營國公  
諡威襄賜葬京師聚寶山之原公孝友仁恕恭儉誠實

出於天性母夫人嘗疾篤懸身燈告天求以身代疾遂  
愈人皆謂公孝感所致後母夫人卒公廬墓側晝夜號  
泣不絕聲卧寢於地毀瘠日甚一夕夢母夫人告曰地  
濕則致疾致疾則傷生汝固純孝惟竭忠報國為父母  
光墓不必廬也公感悟而歸家三年之中哀痛如一日  
平居兄弟怡怡克盡友愛御軍行師動有紀律推心任  
人甘苦同之其攻克州郡必禁虜掠戒殺降封府庫收  
簿籍一錢尺帛不敢私嘗北征軍法夜必令親軍更直



荷戈環帳立一夕風雪大作公悉罷遣歸營其愛恤軍士多類此家居簡靜好讀書天文地理百家之說靡不通曉教訓子孫以儉素力學為務事太祖高皇帝四十餘年小心謹慎未嘗有過眷遇雖隆而自處益謙上嘗御便殿賜坐適有奏事者公趨避之上曰卿第坐朕自理事不汝闕也其見敬愛如此時公卿多置田產公多不治上問之對曰臣一布衣荷陛下寵靈叨有封爵子孫衣食餘饒安敢增益俾生侈心上善之嗟歎良久公



鑰散騎舍人錡早卒鈺贈承德郎尚寶司丞鈐旗手衛  
指揮使女九人長適府軍衛指揮僉事蘭瑜次適濟寧  
衛指揮使弋某次遼王妃次適府軍衛指揮僉事趙斌  
次郢王妃次適金吾右衛指揮同知范聚餘早卒孫男  
二十有八琮琰璧塘瑄瑾珽瑤璫璟玘瑋瓊璉瓚瓛  
琰餘尚幼琮府軍衛指揮僉事琰襲武定侯瑾早卒珽  
尚寶司丞瑤梁王府典寶璫璟皆勲衛孫女十六人長  
仁宗昭皇帝貴妃次適留守左衛指揮陳鑑餘在室會

孫男五人聰耽餘尚幼聰散騎舍人予觀前史稱郭汾陽功蓋天下而主不疑位極人臣而衆不嫉富貴壽考始終令節七子八壻諸孫數十人俱膺顯仕唐世榮之若公勲業之隆子孫之盛方之汾陽夫豈多讓皆由公存心一本於仁故積累之厚愈遠愈隆焉嗚呼偉哉琰以神道之石未立無以昭示永久來請文予閱其家傳考定其大者次第之而系之銘曰

天啟皇明淮甸龍飛乘時應運風雲一機太祖受命汎

掃餘孽羣力桓桓鼓勇就列東征西伐北南以平斷出  
神聖功協衆能展也郭公有文有武翊輔真主實天畀  
付鄱陽之戰衆論偉公公仰廟略不有其功既捷通州  
再捷太原河南北平黎庶懷恩南詔之征武功尤大誅  
叛全生蜀民是賴蠢彼殘孽偷生漠北卷甲擒之妖氛  
蕩滌皇有嘉錫錫爵褒功金書鐵券武定啟封錦袍御  
馬白金文綺赫赫高門煌煌戟棨世聯國戚代有顯融  
匪幸所致惟公之忠忠在朝廷載之信史亦有孝思永

錫爾類在昔汾陽著勲有唐公實似之於今益彰我作  
銘詩勒功墓道百世斯承有赫其耀

太子太師郭公神道碑

天眷國家誕啟中興之運必有英傑為之股肱運謀効  
力於其間而後勲業克成故榮祿大夫太子太師郭公  
實其人也公諱資字存性姓郭氏河南武安人曾祖諱  
溫父仲禮皆以公貴贈榮祿大夫太子太師曾祖妣淨  
氏贈夫人祖妣馮氏妣王氏皆加贈一品夫人公生而

穎敏志氣超羣兒弱冠入邑庠從師受春秋有所造就  
洪武辛酉入太學甲子領應天府鄉薦明年會試禮部  
對策大廷賜同進士出身初為戶科庶吉士擢戶部總  
部試主事丁外艱服闋實授本部湖廣清吏司主事改  
陝西清吏司吏不容奸聲譽頓起陞都察院左僉都御  
史無何尚書郁新以才薦之授前北平布政使司左叅  
議蒞事之初即以本司弊政為言太祖皇帝嘉其忠直  
陞本司右叅政公悉心殫慮贊佐有方不數月陞左布

政使精勤詳慎紀綱大振豪猾歛跡良善獲安時太宗

皇帝在藩邸尤愛重之公有所言無不聽納及起義靖

難命公城守撫輯兵民供給糧餉百費所需未嘗乏誤

嘗以漢蕭何擬之太宗皇帝即位論功召陞戶部尚書

賜白金文綺楮幣視諸伯未閱月以北平重地乘命秉

傳掌布政司事未幾詔建北平設行部拜公行部尚書

公以北地軍民初安生業始遂而官司所費冗濫當擢

節以恤下乃惓惓以祛弊舉廢為務或有不悅而謗公



者太宗聞之降勅慰諭益以心腹任之滿考賜宴內廷  
頒勅獎諭錫以誥命贈公祖若考皆資政大夫北京行  
部尚書祖母及母皆夫人歲辛丑太宗皇帝都北京革  
行部調公戶部職務叢脞公勤以率下事有條序仁宗  
皇帝嗣位念公舊德以尚書兼太子賓客已而復念公  
抱疾艱於步履不忍煩以政事特陞太子太師俾致事  
歸鄉既加賜賚又令戶部給公半俸蠲其稅糧差徭特  
賜璽書慰勞甚至公歸杜門教子孫讀書屏絕外累皇

上嗣登大寶眷求老成念公祇事列聖勞績居多詔起復掌戶部事免其趨朝朝賜鈔二萬貫公愈感激効忠雖祁寒盛暑必坐公署視事不暫廢僚屬胥吏莫不敬憚焉滿考賜宴於禮部獎以勅書譬公如歲寒松柏愈老愈勁其優待隆厚至於如此宣德癸丑十一月疾劇屢言蒙被朝廷重任無以效報為愧切切訓諸子及孫當感恩思報不及家事十二月癸丑卒上深悼惜為公罷朝遣禮部尚書胡濙賜祭勅工部製棺營喪塋贈特

進光祿大夫柱國湯陰伯諡忠襄官其子佑為戶部廣  
東清吏司主事公生元至正辛丑十一月己巳享年七  
十有三卒之日家無餘貲公卿大夫皆往哭弔致奠祭  
配陳氏賢而勤儉累封一品夫人子男五長儀先卒次  
即佑又其次曰儼曰倫曰俊女二季榮高讓其壻也孫  
男十七人孫女十二人惟公廉介勤慎剛果有為自始  
仕至老視國事如家事凡所施為毅然自任不畏強禦  
雖怨有弗避害有弗辭與人辨論嚴厲之氣見於詞色

而推之於政畧無害人蠹物之心誠國家忠謹直亮輔  
弼之臣也佑奉樞歸以某年某月某甲葬某山之原乃  
以郎中黃璿所狀事行來請文勒之墓道以垂永久余  
與公交好三十餘年不可以辭既序其槩而復系以詩  
曰

川嶽降靈篤生賢哲乘時奮庸以樹勲烈惟公之生早  
負俊才列職郎署超僉憲臺風猷克振綱紀斯秩出叅  
大藩政興弊息凡所設施算無遺策顯命薦臨特拜方

伯赫赫太宗仗義而興命公居守撫民餉兵既正大位

嘉公勞績進位尚書厚其賚錫公愈飭勵經國如家謗  
怨弗恤恩寵屢加仁宗嗣位眷顧尤重兼秩宮僚式隆  
任用念公抱疾進位師臣俾休於家疊施以恩皇上繼  
統眷公耆舊詔復任事寵待加厚維公忠貞衆所共知  
維公勲業顯著於時筋力雖衰寸心猶赤奄忽長逝帝  
用悼惜贈爵賜諡喪葬是營官其後嗣存沒光榮維茲  
光榮從古罕致公具有之其誰克似武平有山鬱鬱其

崇勒文墓道垂耀無窮

故光祿大夫柱國少師兵部尚書兼華蓋殿大學士贈特進光祿大夫左柱國太師諡文貞楊

公神道碑

楊溥

正統九年三月甲子光祿大夫柱國少師兵部尚書兼華蓋殿大學士楊公卒公在疾時自為墓誌及卒其子穉穉號泣請余為神道碑文神道有碑制也墓有銘古道也義不可辭乃序而銘之公西昌儒宦家子諱遇字

士奇別號東里曾祖景行元翰林待制祖公榮考子將  
累贈以公官曾祖妣祖妣妣皆夫人公一歲喪父鞠成  
於母夫人陳氏自幼端重異羣兒受業於鄉儒海桑先  
生海桑母夫人世父也見其敦敏甚器重之公自知學  
手不釋卷十二三通舉子業鄉人請為子弟師嘗有儒  
生過館下棲棲然攜書數冊公詢之聞其母老無所養  
乃分其徒之半與之俾得束脩奉母姑氏舉家瘟疫門  
無人跡公夜宿其家浹旬為之調治全愈始還於是寢

有聞於鄉里母夫人嘗曰吾兒力學嚮義足以光先世  
及弱冠出游章貢章貢守儒者嘉重之俾攝琴江教事  
琴江令亦儒者深賢之公感知已勸令尚平恕嘗為之  
言脫誣枉重罪數人或持金謝公者公若不與聞斥之  
出遊江湘所至人敬慕欲薦之輒辭不就遂有聲江湖  
會朝臣以名儒薦徵入翰林編纂一時儒者稱公博洽  
試於吏部考其文為首遂有聲於朝授王府審理副復  
召入翰林編纂太宗皇帝入正大統改授編修屢遷翰



林學士改左春坊大學士洪熙初陞禮部左侍郎華蓋  
殿大學士踰月陞少保兵部尚書尋陞少傅階榮祿大  
夫正統初陞少師階光祿大夫公歷事列聖四十餘年  
信任始終薦臻極品夫豈偶然哉太宗皇帝初臨御修  
復成憲撫綏夷夏神謀聖斷洞合事幾時在翰林與密  
勿以敏捷幾智承眷顧者亦有其人公獨持重勤事未  
嘗以賢智先人嘗受命與廷臣議事公審衆長以聞上  
稱公能服善及車駕巡北京命皇太子監國乃命公輔

導時營建北京征勦叛寇匠作軍興徵於南方者咸啟  
白皇太子公言監國之體以尊君順親為心皇太子嘉  
納之凡所奏對及裁處庶事鮮有過舉仁廟即位公以  
宮僚薦膺重任知無不言言無不納曾不踰年裕民之  
政舉行無遺嘗賜勅褒重之賜象牙圖書曰貞一以表  
其心賜銀章一曰繩愆糾繆俾匡所失賜畿內田四千  
畝固辭請業貧民詔三俸俱支公懇辭尚書俸宣廟臨  
御益見禮重及東藩構亂公隨駕東征罪人既得公請

絕浮言以全親親開釋脅從以廣仁恩上嘉納之今上  
嗣位公以老成弼亮治化啟沃聖學力所可為者身任  
之恒恐不及常以高年辭弗許上憫其情命還鄉展墓  
公以三孤之重還鄉里謙抑自處如昔在鄉里時甫數  
旬即來京又六年遘疾上命名醫療之久不愈賜璽書  
寬慰及賜寶鈔光祿酒饌以資養之竟不起時年八十  
上深惜之輟視朝一日遣禮部尚書胡公諭祭贈特進  
光祿大夫左柱國太師諡文貞仍命有司給舟車歸其

喪葬鄉邑白雲原是年某月日也公存心忠厚急於為善自布衣時篤念族屬周恤急難審取舍行義卓卓為人稱道及為大臣識達大體嘗曰大臣以薦賢為本然全才難得故所薦引取其所長不求其備公壽考康寧恩榮始終宜也非幸也娶嚴氏累贈夫人繼郭氏累封夫人側室李氏子三稷穉秣女四人梁楫蕭承恕劉鈞蔣重其壻也孫男六昱晟暉昉晏昕女三人朝廷修三朝實錄公為總裁筆削有公論平生所著有沙羨稿石

臺稿文籍志法書志東里集總若干卷藏於家公立心  
制行有自撰墓誌有東里傳有小傳溥自出仕與公交  
游在館閣議事彼此不能無可否退而歡如也存亡之  
感曷有窮已茲用撮其概書之神道為之銘曰

斯文遭際千載亨期以翼君德以福羣黎越稽往古異  
世同規皇明啟運大統重熙純佑有命挺生瓌奇左右  
密勿四紀於茲玉成耆德以臣以師中流砥柱羣疑筮  
龜天不憖遺吁其孔悲

明文衡卷七十七


謹案卷七十五第五頁後二行博裕勒舊作卜魚  
又哈勒哈舊作哈刺哈今並改 後三行盆鴻  
特穆爾舊作粉紅帖木兒今改

卷七十六第十一頁後三行伊勒都舊作迤都又  
爾爾布哈舊作乃兒不花今並改

卷七十七第二頁前七行伊埒特穆爾舊作月魯  
帖木兒今改 後五行哈喇舊作哈刺今改後  
仿此 十六頁前八行諤斯巴舊作五十八今

改 十七頁前三行呼沁舊作忽辰今改 十  
九頁前四行納噶楚舊作納哈出今改 後三  
行約約舊作咬咬又納木曩嘉卜舊作乃曩家又  
縲固達勒舊作與古達兒今並改 二十頁前  
一行阿扎克實哩舊作阿扎失里今改





總校官庶吉士臣張能照

校對官編修臣閔懋大

膳錄監生臣吳魯田

膳錄監生臣楊仁基